

存素堂詩初集錄存

存素堂詩初集序

凡人工一技雖承蜩畫筴必有獨至之思專精之詣然後可以永其名於天地間詩之爲道殆有甚焉陳后山每登吟榻嬰兒雞大都寄外家孟浩然落盡眉毫王維走入醋甕其溺苦若是何哉盡不能吐棄一切惟詩之自歸則亦不能絕險鑿幽而探取其微旨然而猶有人之天存焉其人之天有詩自能妙萬物而爲言其人之天無詩雖勤之而無益調之而無味削桐可以成琴瑟磨旌其能成劔也哉唐人詩曰吟詩好似成仙骨骨裏無詩莫浪吟時帆先生天先與之詩骨而後生者也故其耽詩若性命然有詩寵焉與之坐臥有詩友焉與之唱酬有詩話焉抒其見聞識解其篤嗜也不以三公易一句其深造也能以萬象入端倪荀子曰不獨則不誠不誠則不形先生之於詩如此

其獨且誠也宜其形諸筆端自成聲逸倂然淵其志和其情續
乎其猶模繡也蒙以詩二冊寄余校勘作序枚老矣其能以將
盡之年序先生未盡之詩乎然讀先主此日之詩可以知先生
他年之詩兼可以知先生之爲人於詩之外何也言爲心聲詩
又言之至精者也試觀漢魏三唐以迄兩宋元明凡以詩鳴者
大率君子多僉人少方知聖人立教以詩爲先其效可覩矣且
心善則虛虛則受昔薛道衡有所綴文必使顏摠摠捩疵病古
傳人大抵如斯枚敢不抑心所謂危亦以告耶其應去應存都
已加墨而卽書此一意以弁諸卷首乾隆癸丑四月旣望錢塘
袁枚拜撰時年七十有六

夫羚羊挂角滄浪託之微言明月前身表聖標其舊目探詩人
之奧窺作者之籙莫不宜契圖靈旁通定慧是以堯率天上神

游白公聖壽寺中夢迎坡老風根不昧妙悟自生逸興遡飛清
詞算發飄飄乎蟬蛻五濁鶴鳴九臯矣吾嘗於今之稱詩者得
二人焉一爲遂寧張檢討船山其一則時帆祭酒也船山華實
布濩風雲竝驅濁酒助其新瀾奇書屑其古涕奏扶婁之技變
化若神載姑蔑之旗文采必霸運智慧刃樹精進幢所謂師子
吼也時帆吐納因心溫柔在誦戢誓英靈之集挾張主客之圖
涼月來尋賞清乎竹柏鮮雲徃被輔潤乎苔岑傳無盡燈宣廣
長舌所謂天樂聲也二君者所詣各殊所稟則一又幸同官
禁近遭遇

昌期讀未見之書進太平之頌每當香烟袖出蓮炬籠歸時翫
晚花或摘新葉梅炎藻夏宜歌乎南風玉壺買春適來乎舊雨
鏘天得句擲地成聲余亦未嘗不泣二國之載書通兩家之騎

驛也顧時帆與余交最久而爲詩又甚勤隱侯製賦恒以相要
陳思受言因而立改蓋以風雅爲性命視箴規若藥石故其篇
什尤富淬厲益精嘗出其存素堂詩集屬余序之觀其醞釀羣
籍黼黻性靈清而能腴刻而不露咀英陶謝之圃躡履王孟之
堂落木無陰歸羽明其片雪空山畢靜響泉夏其一琴能使躁
氣悉平凡心盡滌非夫餐沆漚之味抱雲霞之姿者烏足語夫
斯乎惜余偃蹇風塵蕭條楮墨感素心之與共愧弱腕之不靈
譬之望姑射之居企化人之宇僅能彷彿有間神明願質之船
山庶乎龍象蹴踏之塲華嚴香火之會前因可證慧業同參解
脫黏散透發微妙銅鉢一響天花四飛回首靈山翕然相視而
笑也嘉慶五年秋八月中浣同館翁吳錫麒拜撰

一代之興必有碩德偉望起於韋轂之下官侍從歷陟通顯周

知國家掌故詩文外復能著書滿家以潤飾鴻業歌詠太平如
唐杜岐公佑明李少師東陽者庶幾其人焉少師雖家茶陵然
其先世則以成籍居京師與生輦轂下無異也若予所見則今
之國子祭酒法時帆先生殆其人矣先生二十外卽通籍官
翰林同翔

禁近者及三十年作爲詩文三館士皆競錄之以爲楷式先生
又愛才如命見善若不及所居淨業湖側距黃瓦牆僅數武賓
客過從外卽鍵戶著書所撰清秘述聞槐廳載筆數十卷詳悉
本朝故事該博審諦人有疑輒咨先生先生必條分縷析答之
不以貴賤殊不以識不識異也先生性極平易而所爲詩則清
峭刻削幽微宕往無一語旁沿前人及揣摩名家大家諸氣習
較懷麓堂集似又可別立一幟不多讓也予爲詞館後進承先

生不棄前後唱酬者五年今予以第喪乞假歸先生曰君知我最深序非君不可余因曰先生之所居李西涯之舊宅也先生采擇之博論斷之精杜君卿之能事也然則他日撰述益多位望益通顯本學識以見諸施行者視二公又豈多讓詩文特其餘事耳余行急請卽錄是言以爲序嘉慶三年春二月同館後學洪亮吉謹序

蓋聞懸黎結綠非山林之珍逸鵠潛虬豈池籞之玩是以通方之才罕覩異量之美難兼自古文貞丈人儒林學士詩吟仙露辭挾叢雲執制誥之杓魁標著作之準的非不周張黼繡調宅莖英然而極涌胸中之思終尠事外之致藝苑所傳類皆然矣梧門先生六籍挺鎔萬流淵鏡早預承明之選得讀中秘之書博聞不矜探天物始聰聽無閤識厥旨初揚雲靈節之銘終軍

奇木之對賈逵神雀之頌班固寶鼎之歌俱足以潤色

皇猷軒輶

帝載遂乃職司太學秩峻清卿龍勺犧尊習環林之禮蟲書蚪
篆摹獵碣之文鳩採典墳古訓胥經寫定麋興孝秀士類藉其
獎成宜乎發揮霄翰吐納瓊音使邢魏推工常楊讓美也而先
生則表夷曠之雅度抱清迥之明心忘情於榮辱之羅証悟於
損益之卦司州逸興時好林澤之遊幼與高風別具邱壑之性
信并介於往籍均貴賤於條風積水一潭狎波間之鷗鷺清琴
三疊招海上之蜻蜓雖紆青紱不異荷衣縱在朱門如遊蓬戶
其職業也如彼其懷抱也又如此信可宏長風流增益標勝者
歟故其爲詩也幽愜山志淡契仙心濯魄冰壺浣腸珠澤美理
之輝自照靜雲之陰不移振瑤韻於寥天接琚談於曠代岩松

林菊彭澤之憺詞也海月石華康樂之逸調也香茅文杏摩詰之雅製也疎雨微雲襄陽之俊語也至若春潮帶雨秋浦生風則又兼左司之恬適柳州之疎峭焉桃花流水靈源自通桂樹小山清夢長徃夫乃嘆采真建德之國以心構難以迹求也姑射化人之姿在神合不在貌似也芳燦與先生測交既証前因嗜古亦同素尚一編著錄曾邀月旦之評千里貽書夙有風期之遲茲來京國遂託心知猥以詩篇屬爲論次欲破拘方之見敢陳連犂之詞俾知謝公寢處自有山澤間儀逸少襟情時作濠梁上想又何待雲裝解散烟駕辭金始詠招隱之詩著遺榮之賦也哉嘉慶八年六月既望金匱楊芳燦序

存素堂詩初集原序

余自十二歲卽喜聲詩屬草秘不敢使塾師知十六歲肄業
宮學雖頗有作亦未存稿其存者皆故友常月阡手爲抄錄月
阡死其稿亦亡乾隆四十五年庚子入詞館專攻應制體適性
陶情之作寥寥焉厥後提調書局入侍

講筵交遊漸廣酬答遂多癸丑歲檢篋中凡得三千餘首吾友
程蘭翹王惕甫皆爲甄綜之彙鈔兩大冊寄袁簡齋前輩審定
簡齋著墨卷首頗有裁汰洪稚存編修又加校勘存者尚有千
餘篇其後汪雲壑同年掌教蓮池書院合前後諸鈔本皆攜往
許爲編次作序余屢以書促之雲壑但求緩期及雲壑補官來
京師余過城南深宵對榻挑燈款語每言及此雲壑以謂商定
文字不可草草當平心靜氣出之不特有以報足下且使天下

後世無議我二人爲也其於重如此閱兩月雲壑遽以病歿嗚乎雲壑死余詩不傳矣詢其家人云雲壑在牀枕間猶把余詩呻吟唱嘆及倉卒易簀兩大冊不知所往此造物者爲余匿其短未可知也嘉慶元年丙辰余官祭酒今戶部主事新城涂君官助教善書工詩余一詩成輒就君徵和君亦喜余詩因取余向所已廢之稿塗乙莫辨者以意推測手寫成編余亦間出記憶短章附益之起庚子訖丙辰鈔爲十卷前此蘭翹惕甫簡齋稚存雲壑所點竄欣賞諸長篇多不在其中因念余詩無足深惜而生平知好或已死或遠別而手墨盡歸零落可傷也已丁巳以後乃每年錄爲一冊手自排次雖榛蕪菅雜有待芟除要可無失孔子曰及其老也戒之在得余明歲行年五十德業未進徒此結習沾沾未忘其於老而戒得之旨能不矍然乎雖然

失者不可復得得者又豈可復失耶吾亦適吾情已爾得也失也其或幸而卒傳於後也與其不幸而終已無傳於後也皆天也而豈吾之所敢知也時嘉慶六年辛酉重陽日

像贊



其道足以霖雨蒼生而不為人
爵所縛其學足以衣被士林而
不以時名自牴牾偉哉造物乎工
於位置斯人老其身於文學之
官俾得昌其文於著述有吳生
者後公最早知公最熟公亦許其
知言而以畫像贊屬嘉慶癸亥

日次析木寒雪初霽几葉如沐吳
生滌硯吮豪墨其右曰松石袁畫
詩畫氣華名山任重不謀其家
為宋東坡為明西涯公論領之
謂我非詩同能後進淮南吳鼎題
宦退如鷄學進以年邊腹有畫
衍口不錢空山古林其素浩然猗

欽先生洵矣可傳
館後進鮑桂星歟

其心皎然如月於秋其氣盎然如
雲於春不榮不悴中有真我者
存文章山水亦偶寄焉況以緣
之援之又何必累其蕭散之
神耶
蘭雪吳嵩梁歟

存素堂詩初集錄存總目

第一卷

庚子正月至
戊申十二月

古近體詩百九首

第二卷

巳酉正月至
庚戌十二月

古近體詩百十四首

第三卷

辛亥正月至
十二月

古近體詩八十七首

第四卷

壬子正月至
癸丑十二月

古近體詩七十五首

第五卷

甲寅正月至
乙卯十二月

古近體詩八十首

第六卷

丙辰正月至
戊午五月

古近體詩百六首

第七卷

戊午六月至
十二月

古近體詩七十八首

第八卷

巳未正月至
十二月

古近體詩百五首

第九卷

庚申正月至
六月

古近體詩六十九首

第十卷

庚申七月至
十二月

古近體詩七十三首

第十一卷

辛酉正月
至四月

古近體詩七十五首

第十二卷

辛酉五月至十二月

古近體詩七十六首

第十三卷

壬戌正月至七月

古近體詩五十一首

第十四卷

壬戌八月至九月

古近體詩八十六首

第十五卷

壬戌十月至癸亥二月

古近體詩六十九首

第十六卷

癸亥二月至六月

古近體詩九十七首

第十七卷

癸亥七月至八月

古近體詩九十四首

第十八卷

癸亥九月至十二月

古近體詩八十三首

第十九卷

甲子正月至四月

古近體詩五十首

第二十卷

甲子五月至八月

古近體詩六十二首

第二十一卷

甲子九月至乙丑三月

古近體詩五十六首

第二十二卷

乙丑四月至九月

古近體詩百十八首

第二十三卷

乙丑十月至丙寅三月

古近體詩七十四首

第二十四卷

兩寅四月至
十二月

古近體詩百五十首

存素堂詩初集錄存卷一

柏山

庚子

○ 始春遊昆明湖

春波平不流孤棹寒烟下初旭入空林
饑鳥噪平野殘雪露松梢斜陽動遙
顥傍城四五家冷翠撲簷瓦村醪何處
沽一角山如寫

訪邱介村

福慶不值

積雨那堪人獨坐幽齋尙有竹相依
故交別久移樽好老樹秋深見葉稀
雲去不妨留半榻月來仍自掩雙扉
書籤茗碗蕭條甚誰遣孤鴻向客飛

○

張雨村

溥

止宿草堂

種花十載住西岡幾度尋詩過草堂水氣忽然空北渚客愁容
易到斜陽千家燈火新樓閣萬里秋風古戰場知有并州詠史
句迎門先與問奚囊

○ 移居

草自青青夢自空玉川擬住落城中燈深茅屋有時雨舟泊柳
塘無盡風貧後相依憐老鶴愁來何處盼歸鴻陳平原是千時
器隘巷誰期轍迹通

、 吳蘿村德化夜話

柴門經雨綠苔香倒屣迎君過草堂十載知名黃叔度一朝握
手蔡中郎青蟲抱葉情原苦白鶴依人氣自昂愧我詩才非謝
朓風琴同詠夜清涼

、 宿順義縣東郊

驅車入古縣落日下荒原松子鼠捎落草橋鴉踏翻潭空時見
月屋小不成村何處射鴈好寒雲掩蘭門

辛丑

○ 次菊溪 百齡編修韻

水氣上衣綠野風吹草香故人重握手佳日獨登堂雲影澹花
港鳥聲清竹房壤琴持換酒松子滿空牀

○ 前湖

暝色濛濛萬樹齊春陰只在畫橋西隔湖望斷歸雅影清磬一
聲山月低

○ 次樹堂 德昌侍講西苑下直卽日韻

又見西堂日影斜兩三小吏抱書譁野雲荒店客沽酒疎雨短
橋人賣花種柳何須陶令宅看桃仍憶杜陵家翰林下直無他

事一路尋詩踏軟沙

○

壽安寺

卽卧佛寺

碧桃花開鶯亂飛老僧採藥猶未歸僧未歸看山色去年殘雪
消未得我來坐愛春岩青晚村行踏松陰黑一勾飲寒泉江湖
放浪知何年不見萬樹經秋枝葉改枒槎剩有娑羅在寺樓新
月如相待

○

退谷

梨花滿山浮白雲花耶雲耶杳莫分侍郎衰病猶好事曳杖時
就孤亭醺飛鳥自掠松頂去丁丁斧聲響何處酒醉不知風雨
來詩成合有江山助老年筆墨隨縱橫夢中說夢題春明殘書
萬卷沒烟草斜陽半谷聞啼鶯

櫻桃溝

夕陽明遠山殘紅滴水內水紋暈櫻桃玲瓏光瑣碎我從谷口
出眉髯染寒黛曲折歷數阪始與孤亭對乍疑楓樹林經霜遲
醉態又似糝丹砂塗抹峯腹背筐筥恨未携攀折恐不逮春禽
罷幽咲僧厨松子碓

香山道中

榆槐陰上天雲霞光入水數鷗殘照明一牛杏花倚山光引我
行迤邐不知里藉草憇蹙時幽鳥催客起遠岫圍作屏層岩列
爲几芙蓉幾萬朶凌空忽青紫偶逢採樵人疑是赤松子

○ 菊溪移居怡園奉柬

短短迴廊小小山藥欄周匝竹門關欲尋枯木寒冰夢只在疎
簾清簾間

贈李處士

如君足跡半天下六十歸來未是遲
石屋睡醒前夜酒秋軒花落一聲棋
村翁笑問長生術學士爭傳晚歲詩
指點南山談往事此心惟與白雲期

廣慈菴示僧

微明

濛濛山翠隔林微古刹香清晝掩扉
石罅無雲龍自臥松關有月鶴初歸
僧龕火爲傳燈燹佛髻花常化雨飛
默向摩尼尋秘鑰不須是是更非非

送姜孝廉

中存

本是歸鄉客翻成越國身山村花釀酒
水館鳥呼人詩味閒時永交情老去真
入門踏荒徑松菊滿園新

8

秋日雜咏

昨宵池上水今日池中水水胡動以盪
水胡堅且凝水水皆不

知時至候自微妙理析清機小除積大乘魚潛自泚泚狐疑自
兢兢春風適然來吹出綠數層欣欣遇卽目沄沄波又興

老菊盆中荒枯竹燈前瘦簾疎風易入窓虛月先透聊常容膝
安不覺誅茅陋念彼華屋居士木衣綈繡堂皇列旂旄出入變
昏晝外觀常有耀內省寧無疚道人坐空山一笑雲出岫

驅車出北門我馬抑何劣瞻彼軼塵者揚鞭去何瞥而我至山
椒迤邐造喘皞彼車竟不來中道驚銜轡力小慎幾微氣矜易
摧折人間有飛黃吾不敗吾轍

壬寅

萬泉莊

北風吹不枯積雪融漸綠水烟與空色遠近湛林木閒方羨白
鷗健早愧黃犢行行石橋南忽見酒人屋幽曠我天性遂欲此

卜築晴沙聚迤邐細淙流洄湫草堂一燈孤詩夢三杯續月魄
起夜窺雲鬢卧朝囑簪紱不累人心跡滌塵俗前事悵已往來
日悲太促且坐清泉尾涼月手自掬任爾百鳥喧掩門聽飛瀑

白石橋

雪液松根流烟水溪頭濺瀉入杏花西斜陽紅一片近河三五
家生計魚鰕賤我爲看花來瞥逢松竹健無心隨白雲蕭然入
僧院山色餐未飽經聲聽已倦欲逐林鴉歸回頭溪月戀

萬壽寺

假山起巍峩有岩復有洞石厂黑無月寒燈夜不凍松櫟風中
噴春氣繖繖送白雲何處來爲補山之空跣跏坐片時心已異
凡衆却笑古神仙徒自狡獪弄黃梁飯又熟神仙亦是夢窓外
桃花開枝頭幽鳥暝

○ 昌運宮

老檜青上天樹底剩白日影忽西沉檜陰牆外直當年種樹
時此樹無人恤誰知此金錢付彼千荆棘檜也老猶在遊者未
勿憶我來坐其下頓覺塵俗失千年鶴又歸彷彿舊相識一聞
吟嘯聲雲中長嘆息

○ 青龍橋

天恐四山影渾成翠一片截之以橫流曲折使各見清泉迸古
石青碧滙爲淀長橋亘厥中蜿蜒倚晴甸過橋水聲大況有春
風扇一雙蝴蝶飛杏花滿僧院

○ 大有莊

草香及水香沁人腸腹內渴飲南山泉飢餐北峯蕪遂令詩人
胸不着纖塵穢草堂誰所闢幽澗殊可愛虛沙漲石根殘竹倚

花背晨窓弄紙筆午市售魚菜夕月照前溪松林黑無礙

△ 清楚寺

烟翠散平蕪春聲闕古刹辨此山水音安用鐘磬軋聖賢時自
鞭塵垢願長刷安禪夢亦清踏石脚防滑月綠林意空天碧村
影鑿行遠乏車航懷人託詩札坐閱燈滅明還聆鳥嘲哢夜深
聽微雨冷冷花外戛

● 善緣菴

滿厨蒲筍香一院松柏氣況當春雨罷寒綠四山旣老僧具鉢
飯中乃有詩味誰說文字禪淡泊不足貴至理在眼前辭多翻
覺費胸中生意足慨然念百卉

○ 曉發釣魚臺

雪色罨牆陰日華薄林幹春鱗跳輕冰野鷗立古岸柳色綠初

齊桃花紅已半炊烟牛背分人語漁艇亂隴雲漸漸沉溪流稍漫把鋤愧未能振衣時自嘆淡懷企巖阿塵事苦羈絆何當挂布帆尋僧下江漢

黃新庄

山色蒼然來天光益平遠郊行未百里意適頓忘返柳陰馬初秣松根客思偃春風野店涼細雨孤村晚飲酒量苦薄吟詩句苦寒戴星起東裝隴頭已耕墾

留犢村

雨聲先上柳春寒不到麥黯淡古斥堠臥牛猶有迹三五把鋤人日午睡寒石我行留犢村塹作聽鶯客酌酒尋荒祠題詩付破壁古人惠政貽大半始阡陌

賈島墓

衆多嗤輕狂我獨憐淪謫生爲西峪僧死作東野客世無韓吏部一坏誰愛惜歸鳥噪夕陽杏花明古驛涓滴薦寒泉想見君詩格

督亢陂

敢取督亢田去作秦王餌捐軀誠慷慨胡乃昧機事徒令行路人爲墮數行淚側聞裴延儻修復古廢棄漑田百萬畝至今猶樂利寂寞月池頭但剩瓦礫積祿祿武遂水濛濛范陽翠誰奪鷗鷺居闕爲秔稻地歲收數石糧勝看千荷菱

樓桑村

誰移黃初統章武去繼漢陳壽三國志不書阿瞞叛我過樓桑村臺榭已朽爛掬泉洗斷碑別薛覓殘翰前列庭筠記後續郝經贊鴻詞示裔皇健筆寫精悍林屋耿斜照跬步餘清曠風雲

色愁鶻燕雀聲悽惋關心歲豐稔麥田殘雪看

、
酈村

纔賞樓桑花又聽酈亭雨鞍馬勞至今漁樵閒自古過訪遺元
居荒葭隔烟浦閉門著書處雲木厯可數我喜讀水經殘缺擬
輯補安能設几席一堂共仰俯

、
黃金臺

馬行獨鹿山雲漫昭王臺千金禮賢士作意尊郭隗辛行與樂
毅絡繹茲臺來王計已訖甚國步誠艱哉遂令數君子甘心蒙
塵埃臺成人慶臺廢無人哀我欲陟臺顛烟翠空蒿萊

、
易水

涿水繞自東涑水環其南大風吹高歌聲撼蛟龍潭至今嗚咽
水夜半猶悲酣漁釣不敢至兩岸花毵毵

癸卯

○遊西山宿潭柘岫雲寺

柘老潭空今古成龍泉菴尙艷春明枯僧性定能忘臘野寺遊
多不記名雨響半天雲有態水流雙澗草無情桃花紅間梨花
白到此啼鶯盡好聲

長天短草綠難齊山入斜陽路漸迷笑我未離支骨馬伴君來
聽放生雞孤村買酒真無價深谷逢花却有題還是腐儒餐易
好野蔬帶露摘前溪

山青斷續樹柯槎步過危橋路更斜石磴梯來成鳥道松烟缺
處見人家高樓月滿一聲磬小閣風疎四面花雪葉晒乾堆處
處夜深撥火自煎茶

燕子聲多雨隔簾銜泥故向舊巢添神仙檢點長生錄坐老頭
廳換一籤

日到花磚影故遲春寒天上不能知爲搜奇字歸來晚立馬斜
陽且賦詩

欽頒太學大成殿周彝器歌

有序

癸卯秋

法式善

官國子監司業得魏范銅十器秘府珍

藏先朝法物希世寶也先是大興翁公方綱爲司業與
今司業無錫鄒公炳泰皆作歌詩以紀其盛不揣固陋
竊附嗣音并令畫工仿原頒圖冊摹成副本恪謹弄藏
爲考古一助云

星雲糾縵羅璇霄

奎文煜煜垂斗杓岐周法物歸太學寶氣翁集光搖搖後聖道

重尊孔子前聖志在從姬朝惟

聖乃能識聖意心之所契神爲調范銅彝器藏

內府三千年後重宜昭已丑

詔薦大成殿上春春吉燔脾膾相通一脈接洙泗爰監二代秦
虞陶槐街春永日薨薨戟門人靜風蕭蕭摩挲流覽考古制重
輕高下縱橫標首山采銅康侯作鑄成寶鼎華紋雕犧尊之制
以象合淡綠渲染烟痕翹二占詩云盛秬鬯內言或取言無斂
六壺八壺詳聘禮連環兩耳銀錯腰用祈眉壽召仲簋蟠螭通
體中斯榻太師小子師望盞夔紋彷彿春巖蒼爵者雀也爲器
小有流有器丹鉛燒記魚絲繞太繁縟素洗一洗澆風澆象山
制鼎雷電亘靈靈欲起雲濤濤觚哉觚哉具稜角虬紋盤屈銅
花飄沉埋歷劫發光惟搜剔苔蘚煩漁樵河濱之陶荆山鑄精

芒砀淡灰塵消陋儒泥古矜臆說箋疏欵識紛嘒嘒小臣生幸際
文治趨踰國學陪仙僚辟雍新復鑄京典窮經稽古榮園橋朱
欄蜿蜒護石鼓好音寧復來飛鴉石鼓設戟門內舊有雀巢樞
鄙詩未能贊美善爰倩畫手摹生綃不惟其工惟其肖庶幾神
物真精饒流傳萬本貽萬世博古圖外增新條尊藏用戒百職
事千秋俎豆同無祧

8

秋曉登山

山空曉色寒秀盡一峯細清菴耿孤夢虛籟生晚霽苔淨露石
根霜寒脫秋蒂五步十松杉層翠萬蘿薜羣衣躡危磴回首天
如翳落葉塵外飛閒雲眼前逝遙聽採樵聲丁丁在烟際

甲辰

8

遊西山宿秘魔崖

曉出西直門一兩山如沐亭館生新涼林樾含淨綠波文平不
流花意靜而淑郊行四十里僧寮上初旭松濤瀉地來爐烟墮
欄角浮屠七級圓倒影壓山麓高泉樹杪飛遠向峯腰東趺坐
證空明古佛自幽獨

幽夢滌寒渾孤情聳晨岫忽聞草露香涓涓滴衣袖萬樹鬱瞻
峩一徑入深秀日脚不落地峯陰森白晝人鳥俱無聲四山松
籟奏三里始出林巖際天光透

凹凸陰晴殊豐碑薜花賦澗以清淨泉隱約露文字文字果何
爲功德讚闍寺著語非不工無乃貢諛媚我性嗜圖籍原爲闌
清悶採藥入白雲回首失寒翠

8 村夜

臨流築茅屋野色不須局鹿飲一溪斷魚鰲孤艇腥村烟連水

暗鬼火出林青山月四更吐老漁殘夢醒

除暑日作

殘暑憐猶在新涼已漸生
六秋詩亦健見月眼初明
樹散雲陰薄天空石氣清
板橋烟渚外又聽晚鐘聲

〇

中秋後七日邀同丁蔚岡

榮祚

方碧岑

煒

許秋巖

兆椿

顏酌山

崇鴻

吳撲園

鼎燮

程東治

炎

初願園

彭齡

郭

謙齋

在蓮

由長河至極樂寺茗話

烟外樓臺樹外村沙堤宛轉接松門
孤亭過雨疎花氣斷港流

雲沒石根窓裏移山成畫
葉詩中著句澹秋痕耽幽更有東萊

客載取寒香翠滿盆

初願園歸時乞僧人山翠花一盆車載而去

丙午

自題溪橋詩思圖

那有溪橋那有詩孤山空寫水雲姿
揭來得意忘言坐便是天
空月朗時

約西老屋久傾頽石淨雲根長綠苔
却有江湖掛瓢客竹窓衝
雨說詩來

8 山店題壁

月氣出花氣水聲穿樹聲尋詩詩不見
獨向磻陰行

○ 白瀑寺

一庵春水外紅杏與青梧鐘響客初定
鳥鳴山不孤酒懷長此
放詩夢近來無雲岫貧難只看花過月湖

○ 題程東冶侍讀所藏王鷗白摹惲南田一竹齋圖詩冊

後用南田韻

一筆自清絕蕭蕭留至今飄零秋扇影珍重古人心涼意酬孤

客烟痕淡遠林山陽數行泪風笛有遺音

南田真蹟阮蘭村先生貽東治先生亡圖

亦失

○ 題徐立亭

準檢討松鶴圖

利頭倚樹根一徑茶烟濕天風海上吹忽送浮嵐入先生坐無語低頭拾松粒拍手招鶴前爲我負詩笈余亦松間人每借松爲笠倘逢孤鶴來出門時一揖

、 偶題

荷葉無花葦葉昏板橋石路宛江村孤蛩莫訴年來愁秋雨秋風客閉門

丁未

、 兕觥歸趙歌和翁覃溪

方綱

先生有序

明檢討趙用賢劾張居正奪情廷杖放歸薨于許國

鐫兕觥贈行後觥爲曲阜顏氏所藏單溪先生視學
西江致書顏氏乞以觥歸檢討五世孫其先生作歌

屬和

兕觥何物神扶持二百餘載精華滋什襲藏之東山陲歸輝謀
出西江湄憶昔贈行都門時文羊一角森黃支星霜剝蝕頻遷
移真香不滅遭逢奇竹垞題句江湖馳息廬序記非余欺黃陳
付愛忠誠遺綿歷歲月傳來茲單溪先生深於詩片語考訂同
龜著銘字摹榜蘇齋楣日光墨彩紛陸離五世賢孫雙鬢絲曰
觥聚散天工爲何人慰我窮年悲不憚千里烟波隨秋風一棹
匡廬追入門稽首涕泣願力求先生爲之詞作忠作孝先生宜
先生於義烏容辭慨然諸復茫然思厚紙細字歌淋漓衡齋暗
古非耽奇玩物喪志儒先規文房遇眼愛麗發百年血氣驚可

知此觥恨不清門貽趙叟對客空長噫萬珠貝莫酬恩私聊播
佳話千秋垂余聞主善無常師此紙自是長安碑摹搨恐有天
風吹他年親訪南軒門登堂一再詢厄匪觥乎猶凜冰霜姿賓
筵斟之還酌之酒花漾綠雲生漪

○ 雨聲

驟響翻簷際清冷到枕旁聽從梧竹館送入菱荷鄉極浦客爭
渡小樓人對床獨慚蘇玉局聽雨轉蒼茫

○ 蟬聲

余亦耽吟客言愁汝最工辨從人語外清到月明中草短秋無
際亭孤夢與空幾回拈險韻畢竟愧雕蟲

○ 葉聲

颯沓不知處蕭蕭幾樹秋荒村雅共語寒隴水兼流響入尋山

展塞生賣酒樓那堪歌枕聽風雨五更頭

水聲

任爾奔騰極塵埃一點無澹懷宜我共清韻更誰俱白石寒泉外秋江畫舫孤小詩參繪事妙境待倪迂

鐘聲

塞烟斷孤寺聲與夢何期入夜了無寐使人空所思詩成禪榻上酒醒客船時有覺務深省還吟齊已詩

雲影

去住本無定因風巖壑間秋生簾外雨澹入畫中山流水不知處天光相與間世方寸我懶似爾太幽孱

簾影

悄悄寒難得濛濛卷未能月移寒不定風漾細無層誤觸憐雙

燕孤垂共一燈夕
鑪烟尚在留取暗香凝

○ 宿古北口

長歌出關塞行役敢辭勞
地冷千泉咽天空萬木號
炊烟含雪重獵火挾風高
野老衝寒至殷勤贈布袍

○ 贈在師

欲向西山去惟消半日程
飽他蔬笋味老我水雲情
聞外人來往花間鶴送迎
野僧嗜文墨佳句費商評

戊申

、 煦齋

英和

公子招同王正亭

坦修

侍講謝薌泉

振定

編

修蕭雲集

大絕

學博豐臺看芍藥

十里豐臺路城南一徑斜
人皆閒似水詩更艷於花
山影柳門隔鳥聲松院譁
倚樽徵故事逸興寄烟霞

清華推謝朓綺麗屬王筠爛醉詩無敵雪巢詩玉堂自有新詩
將離筆有神比齋次余絕句詩欲折將離搜尋金帶句慚愧玉
堂人誰續維揚燕花前結勝因

薊泉編修自豐臺歸得詩六十韻翌日見投次韻

未築林中廬暫稅林下鞅硯北蓄遙情城南發孤想諸客氣觥
觥使我心儻儻及茲花事繁不惜光塵枉逶迤蘆荻村聽聽積
榆朝具此腐儒餐雜彼田家饌况味託烟霞蕭疎遠塵埃十里
綠到門萬頃紅覆壤新陰接桑柘遠韻遙篠簜天晴魚曝鱗波
平鴨引吭脫略謝羈束芒屨出憤痒鸞翔會嶽峙鯨鏗際溟廣
既飯青玉精要啖黃金額雖許勝遊暢勿廢忠言讜石錯尚砥
礪朋簪肯標榜名士負嶽奇名花映烟晃愛士如愛花聞名首
輒仰破扉古蘿補曲徑稚松仗品第列鐵牌護持加旂幟連畦

委宿雲泣隴吸晨沆綽約疑拖紳低斜未脫襪莊嚴擁佛髻飄
忽曳仙輦不從廣陵種獨向豐臺長早絕薜蘿緣遂荷軒冕賞
野人頗居奇詞場互推獎憶昔西河生落拓更流蕩才雄消礪
礪氣俠任慨慷佳句誦今茲美人記疇曩種樹跡渺茫買花意
悽惻前賢逐雲散悲歌臨風悅悵悵有遺音徘徊誰繼響問天
首重搔登城臂斯攘謝氏事况復芍藥詩君家最道上咀華乃
陸離摘藻復條和無酒謀諸婦有詩壓吾黨汨汨勢湧泉挂挂
工結網立言雅包括徵實亦清朗富貴如浮雲百年寄來往胡
然而崔巍胡然而瀟灑果能不溺志萬事等運掌浮沉喻芥舟
幽僻問桂井頃刻幻態呈須彌清福享說餅借蓬門門茗憩茅
廠石磬聲激揚繡幢影暄盪明趙賣花翁舉家
長齋禮佛累世方知色卽空頓
悟一而兩悅耳捐絲竹入手鄙金鏹旁道戒飯飯勝果無摹仿

我輩固業儒平居端趨嚮泥絮沾豈然水乳融差仿隨時結花
緣卽境儻詩帑醉鄉樂陶陶香國春盎盎刻畫旖旎姿現露旃
檀像洞雷震蟄蛟天風吹舂壘躡屐尚支持揮毫殊勉疆葦塘
狎鷺鷗柳陰薦脰鯢起舞詎聞難參禪恒縛象振君芙蓉裳廻
君沙裳纍握手聯漆膠披臆消翳瞶安得扛龍文光燄騰萬丈
、 次煦齋豐臺看花韻

昨宵微雨浥輕塵今日濃雲壓翠闌地僻自應遊客少官閒始
得看花頻詩非著意成佳句天若留香作好春修到華嚴尋法
界同參須結箇中人

、 六月三日邀瑯泉雪巢煦齋長河曉行看荷花遂至極樂寺

出郭荷暗薰到門柳駢黼略約亘橫波長堤界斷淤露氣著葛

衣天光豁林麓難期賓從賢況際風日淑客至不參禪僧枯已
如木亭虛體自涼水流心弗逐殘夢破蝴蝶閒雲曠鳬鶩穉笋
迸石堦古蘚繡茅屋芒蕉炎地陰葡萄當牖覆檜老紛蕭蕭松
圓濤設設秘監留詩篇將耳餘畫幅美景現須彌勝遊期信宿
東華十丈塵金門一囊菽形摧路坎坷氣折車輾轉何如初地
佳更藉遠公築雖乏打漿翁尙携持葢僕礙帽懸藤低粘屐軟
草馥竹爐茶可潑香厨葦初熟消君硯礪胸飽我藜覓腹自居
淡蕩人畧享清淨福開窓看西山萬朵芙蓉簇

○ 瑞光寺

客從雲磴下驚起白鵬飛坐石花垂帽穿林翠濕衣前溪踈雨
過隔水夕陽微不辨來時路青楓動作圍

、 薌泉遊極樂寺之次日復得詩五十韻屬和

好學遊亦佳近義言可復

原約五月望日往遊以雲巢應科試改期

天日騁容與酬

應謝昏夙柴門依斷竿魚網晒曲澳濛濛翠撲衣淦淦波生穀
長柄宕芙蓉連畦展荻秀色誠悅心晴光更娛目縹緲湧珠
宮岩崑控玉麓樾靜覺蟬吟漚圓識魚伏幽偏地數弓蕩滌愁
千斛老僧頗超脫有客皆清淑沿塗樹蕭森入門花芬馥浮生
半日閒諸天無量福苦淡茶半甌平遠畫一幅不讀貝葉經不
識祇陀屋護法現優曇佳卉各成族蕉閣蔭層層松房籟謖謖
午烟藥竈歆甲煎瓦甌郁山厨旨蓄多盤餐羅筍藪酒場雖寂
寥詩境未瑟縮狂搜髭眉然寒索額頻蹙甘苦變俄頃訕訕任
僮僕鮮如出水英峭如懸崖瀑如山轉圓石如水戰迴汰選句
誠倔強臨文貴端肅意到筆隨之履險趾不踣山氣夕轉佳微
雲蕩殘燠雙丫露遙嶽一髮儼新沐柳岸渚渟泓稻田滋霽深

止酒什和陶酌水味思陸醉禪野狐嘯妙趣開鷗逐人生天地
間順逆隨化育誰能工藻績枉自弄機軸巍巍孰登堂惴惴若
臨谷同心諧臭味孤芳媚幽獨無佛更無仙胡諂復胡瀆庶占
缶其盈或免餽之覆心兵韜淬厲詞鏐露芒鏃後望正蒼茫前
修逝忽倏晚菰脆可餐涼泉冽堪掬玲瓏雪泐藕薺瑤瓊點籬菊
魚遊樂可知鵲夢睡初熟床頭頗蘧蘧劍端休齧齏人慚阮籍
達文謝枚舉速君常浮大白我未歌獨漉曰詩不宜耽於酒寧
可黷君視杯脫手竟類車脫轂一斗每百篇藉糟還枕麴茂叔
常愛蓮子猷常愛竹亡羊等爲一呼雉莫爭六君如袖君手吾
且捫吾腹

○ 雨後納涼

庭院藍花斑鄰鄰水一灣雨催涼早到秋與客同閒斜日隱城

角亂蛩吟草間竹陰忽踈淺半面露西山

送謝薌泉編修主試江南

如此江山如此官此行報稱本來難知君自識荊州璞得士應
彈貢禹冠一代文章關氣運六朝樓閣半林樾寄聲南國青衫
客今日歐蘇共主壇

正主考爲胡豫堂先生
余與薌泉皆山先生門

○ 立秋前一日再遊極樂寺看荷有懷薌泉

愛看芙蓉曉日紅一層香裏一層風花光似比去年艷文筆慚
無前輩雄小謝不來誰句好大江此去定詩工尋常五色休迷
眼知爾胸中障礙空

○○○ 立秋日淨業湖作

傍湖聊散步散步卽清遊况有詩詩客同登賣酒樓鷓鴣惟愛
水蝴蝶不知秋連日風兼雨芙蓉墜粉稠

秋夜獨坐

斷橋雲沒處，老屋月明時。
秋影浩無際，客懷空所思。
靜忘蟲語鬧，寒到雁聲遲。
一縷茶烟鼻，垂簾自課詩。

雨後遊極樂寺贈說上人

徑滑新支石，上筇寺門全。
被碧苔封兩，三竿竹自秋。
色千萬疊山，皆雨容詩卷。
涼生禪榻早，茶爐香散佛。
花濃煩君倒，瀉天河水一洗人。
問芥蒂胸亭後嵌石作飛瀑

〇〇 立秋後三日偕徐鏡秋鑑檢討遊極樂寺

疎柳澹成烟，荷花出水鮮。
殘棋斷秋夢，孤磬破詩禪。
松晚綠將雨，竹新涼在泉。
斜陽千萬樹，一樹一吟蟬。

懷鄉泉

江南多白蘋，君已到江濶。
余夢美秋水，相思惟故人。
官真清到

骨用希泉 詩漸等於身萬事閒中過朝朝把釣綸

暮村

風定響黃葉一村樓暮山人來秋草外醉臥夕陽間鷗鷺偶相
見牛羊時自還兒童驚客到拍手白雲灣

禪堂用柳柳州韻

入門頓無暑一庵古月白竹榻支南榮坐老讀書客靈區盪空
明理境秋毫析還聞定遠鐘萬感此中寂

園林晚霽用韋蘇州韻

殘照落盧櫺雨氣荒田園歸從晚枝墮鳥向高林翻幽襟爽端
潮逸興託琴樽委形取恣悅無事勞神魂晚色侵我衣好山常
在門

閑齋對雨用韋蘇州韻

幽居世事隔秋雨霏朝朝水禽立沙渚淨綠靄烟條塵室坐生
白端曼閒自消向夕移竹燈颯颯迴涼飈

見菊花有感

隔橋尚殘水壓帽已新霜同上草俱白籬邊菊正黃秋園惟汝
在寒葉爲誰香待寄南枝到相於伴北堂

招同初願園編修極樂寺探菊范叔度鑒方葆廕維甸

二同年不至

雛花有意爲君開昨晚山僧冒雨來採菊客多攜酒至過溪人
却棹船回貪吟海外新詩卷時叔度葆廕自臺灣軍營歸忍負城西舊酒杯

明日松陰選茶果暫時清話我追陪

勺亭

一勺自天地此亭秋更閒花隨僧意放雲共佛光還入夜或留

月隔牆時露山洗心誰藉爾溪水聽潺湲

○ 偶述

秋已催人老況當幽恨催夕陽蟬語急寒雨雁聲來望遠共明月寄人遲老梅林烏知待哺風外響何哀

○ 送劉青垣躍雲侍郎校書盛京兼懷景堂 福保少京

兆

秋宗自是文章伯京兆曾陪供奉班學使重來遊閭苑故人相見話廬山青垣前歲任江西學使弓刀行色思盤馬風雪吟詩記入關編集不須題出塞校書仍在五雲間

○ 韋約軒謙恒中丞秋林講易圖先生時官祭酒

說是康成舊草廬研朱滴露廿年居三千弟子半名士七十老人猶讀書山水性情經濟在秀才習氣宰官餘秋庭一片槐花

影老筆凌空健不如

、 薌泉計日至都天氣寒甚晨起奉憶

與君避暑宿山寺今日晚涼生角巾千里歸來仍酒客百年傳
有幾詩人受霜竹葉難爲紅傲雪花枝早得春重看禪房舊題
句碧紗籠處墨猶新

、 阮吾山

葵生司寇以一詠軒詩見貽秋夜展讀題後

侍郎真好古山客不干名無術辭貧賤有詩存性情菊花如此
淡孤月爲誰清落葉響簷際一燈相對明

、 慰友人

山水乃君志玉琴時一彈家貧尙慷慨宦人益艱難馬跡踏方
遠鷗知天欲寒且來花下坐月照酒杯寬

、 吳穀人

錫麒編修題詩拙作後次韻

西園看竹我先回
松閣涼生月下杯
料理鷗盟浮水去
安排驢背過橋來
入秋詩漸因禪悟
耐冷花偏待雪催
白舫青蓮仍舊夢
十年三度訪金臺

○施小鐵朝韓侍御爲亡友低峯漢杜作傳感賦

吾道斯人託偏慳
沒世名才堪報知
已拙亦足生平廿載交
心在中途撒手行
知君不談墓聞笛
愴餘情

身誤青衿否情傷白髮何
衆禪成佛早折福讀書多
詩意秋同苦
文心死不磨
篋中餘故紙
半爾手摩挲

○嘉平九日鄒曉屏明泰招同竹坪吉善秦端崖潮小飲

芳讌歸何晚
高談興轉幽
詩尋江寺夢
燈上酒家樓
淡月閑鴉背
寒雲生馬頭
不知徐庾筆
可慣寫閒愁

秦端崖司業招同竹坪曉屏兩祭酒時泉圖敏學士暨

令兄漪園泉編修集延綠草堂

言踐看花約城南舊草堂故人多老輩深巷漸斜陽竹外見山
色詩中餘酒香燈青不須夢自有月華涼
坐久忘官冷情真覺禮疎花春得早池草夢迴初把酒皆名
士排籤半異書橋門策歸騎隔水一招余

○ 藕泉編修招飲

湖海夢何如風來紙閣疎詩人例耽酒病客不工書寒自淡將
夕冬花香一廬暝烟歸路晚已是上燈初

○○ 冬夜幽居

梵響沈孤寺燈花爆短檠酒邊風不到詩後雪初晴入室有虫
語過橋無馬聲寒香在梅竹與結歲寒盟

、 廣慈庵在然上人約同人午齋時時泉廢子典蜀試厚

國德生檢討典黔試回

破除戒律是詩狂
蒲筭年來滋味長
白石寒山誰食密
高齋永夜且焚香
僧移竹竈烹殘雪
雀戀松陰啁夕陽
黔蜀使星歸萬里
弓絲禪榻共清涼

○冬夜展閱吳穀人點定拙集書後

抗懷百年來誰與真
作者浙右朱與查
前後主詩社西冷十子
中如樊謝亦寡往往
圓方隅才能不可假
先生最後出行空騁
天馬取徑絕依傍
數詞屏擗搢有時
乘酒酣萬言一揮
洒茫茫古與今此
筆扶大雅

賤子如秋蠅寒林發細響
得意文詞間取快若播癢
顧將去瑕垢能弗藉剗礪
堂堂匠石門應求無標榜
誘掖且苦心不妨過推獎
其實分量殊似啻霄壤
抑聞古人云取法貴乎上
慮虛

燈影孤巷短溪聲爽投我一卷詩字字珠璣是讀罷清沁心天際春風益

、
適人長闌郎中以行役詩屬校

吾黨多詩人君其傑出者示我行役篇洋洋復灑灑淡月牖間懸秋泉沙際瀉長風折樹梢新霜點簷瓦我方擁鼻吟自恨應求寡詎其未言妙君已傾懷寫不遇九方歎漫誇千里馬

、
除文

萬事豫爲地一心深信天貧愁隨臘盡詩氣得春先兒女聚深夜梅花香隔年幾行紅燭影高照北堂前

存素堂詩初集錄存卷二

柏山 法式善 開文

巳酉

元月

靈雀噪簷際唐花紅牖間春光無遠近詩味此蕭閒積雪新
水淡雲橫舊山層蘇香不淺况喜拚松關

春懷次韻

誰與破清怨小樓人寂寥離心悲遠道歸夢戀深宵雪隱鳥鳴
樹水流春過橋隔溪看柳色綠到最寒條

李濂村 傳 孝廉夜話

劍術老無用酒人貧愈尊共驚雙鬢改相對一燈昏明月亦送
客幽溪自遶門雪蘇枯草凍是否去年痕

、 廣慈庵步月贈在然上人

百瘁汝皆歷老猶耽苦吟鐘聲催客醒詩意與寒深一院刺惟
月兩人清到心梅花應笑我何日過江尋

○ 人日至大有莊憩佛寺

亭午始炊飯老僧能耐貧孤村人日酒高樹佛堂春冰啄鳥聲
碎雲皴山影新過橋踏寒綠一樣畫圖身

、 寄邱介村

醉後枕書眠桃花略約邊松間移白石竹底聽幽泉一別夢如
水十年人似烟回思理雙屐同泛潞河船

、 侯芝亭

借舫
老廉赴粵海

寶劍帶何處奇文休再誇可憐人似雨此去宦爲家海懷春無
聲關清夜不譁有詩煩驛使爲我寄梅花

〇〇 題常理齋愛吟草君名紀潘陽人勦金川殉節

何事溺君志獨於詩愛吟孤忠情不滅幽恨寫何深馬上悲橫
劍燈前坐撫琴空庭淡斜月一字一秋心

天地重奇節丈夫留浩歌魂歸遼海壯詩比蜀山多戰壘雲生
色崖碑血不磨浣花人未死延爾草堂過

〇 春曉偶題

東風料峭雪成泥乳燕低飛認畫題曉日上窗春睡足桃花紅
過板橋西

、 溪上

孤磬一聲落閒鷗無數翻官負詩漸富春冷酒頻溫柳色綠侵
袂桃花紅到門莫嫌境幽僻石屋勝江村

、 題畫

花外夕陽遲漁翁收網時撈蝦春水岸挑菜白雲祠明月忽然
上放船何所之笑他竿到手兩髻已如絲

極樂寺勻亭野望

衆鳥破空去一庵相與孤籬邊牛自返墻外竹誰扶新桐老數花
在松淵千巖無海棠開滿院村店酒重沽

上元前二日雪後煦齋招同謝鄉泉陳毋田士雅蕭雲

集李蓮石華飲葵香書屋

微雪難作花晴雲不成縷雪晴雲欲銷山角日初吐嘉此素心
人招邀輒三五詎待三百杯庭陰已卓午爐烟活火然茶香淨
石乳心恬外垢滌才弱餘力努意到互悲樂詩成無今古清讌
舍管絃詞場設旗鼓或筆矯如龍或氣猛如虎或如別鶴吟或
如迴鸞舞要皆情性真翛然寄仰俯今日天氣寒輕陰低萬戶

冷翠並竹欄淺紅逗梅塢誰克張一軍吾將託強弩惟有酒人
狂高歌酌清醕

題裕軒

圖轡布

學士枚巢遺詩

西郭有松門殘雲抱石根
地餘新草竹龕設舊琴樽
官冷惟師友禪空到子孫
學士無嗣猶留詩一卷讀罷夜燈昏

答友

詩到能工大是難幾人執戟幾登壇
近來一事差堪信不遺鉛華上筆端

同陸璞堂

伯理

學士程東冶侍讀江秋史

德量

編修集

許秋巖秋水閣

芍藥樽前曾結社海棠風又到清明
誰憐夜雨瀟湘客坐聽春鶯鳥雀聲
呼酒恰逢新月上看花忽憶故園晴
西郊蒲鼓尋僧

寺匹馬夕陽無限情令弟石泉編修每退直同行今已下世矣

清明後五日偕菊溪侍御鏡秋檢討邁人郎中東郊作
那得勞生便息機眼前風景莫相違
漁莊隔水市聲遠佛閣下簾山影微
花中春寒仍淺暈鳥窺日上始高飛
溪烟斷處炊烟接晒網家家白板扉

8 攜幼女遊野寺晚歸

我愛閉門坐尋春偶出城
鶯花好天氣兒女亦人情
對酒逢場戲題詩信筆成
倚亭援綠綺彈作水仙聲

西村

一入西村路花多踏作泥
春禽飛上下野水隔東西
石崦家作好雲堂處處迷
倦依禪榻睡日午不聞雞

鄒曉屏祭酒貽詩冊

槐市一溪隔說經時過余正愁前夜雨忽接故人書南浦新詩
卷西山舊草廬天聲振禪榻塵味久消除

○ 過王鑑溪綺書學正賜硯齋

城南半秋水夕陽隱葭莢欲訪幽人浩蕩江湖感題詩託微
尚聞幽吾豈敢細草寒泉香疎花夕陽淡歸來月在衣抱向空
庭擘

○ 同人見賞篇末二語輒衍其意

抱月置空庭月更清於我靜夜耿孤光我來月下坐暗露上衣
重微風出花妥人生閒最難我閒今已頗展卷復欣然不求甚
解可

李石農盤宣同年夜話

紙閣靜悄悄天光清可尋詩搜隔年句菊澹一秋陰對坐却無

語相知唯有心塔前兩松樹霜雪不能侵

東施小鐵太常

名士有天真幽齋無俗塵蒼茫千古事踽踽百年身才大難論
福官高不救貧世方重清節莫竟作詩人

病起偶題

小病藥浮甕清貧錢上义壯心悲櫪馬寒色動林鴉尚喜睡無
夢不知香在花寺樓一聲磬端坐誦南華

病後訪菊溪侍御不遇

無多清興病餘增蕭散聊陪退院僧疲馬易迷三里霧冬心同
凜一條冰花如耐冷春常在詩不求工我未能回首空林落黃
葉月華隔水澹寒燈

糊窓

爲掃塵埃淨須先罅隙防日華溫不散風力峭何妨補後更無
空靜中時有光只緣一層隔山翠看微茫

食粥

修到神仙後方餐薤與蔬不愁衣典盡最好飯香餘松葉燒多
少梅花嚼不如雖然乏清俸羞唱食無魚

、李石農移居蕭寺訪之不值寺盡余廿年前讀書處也
記得招提路雙門獨樹依磨牛陳迹在雪爪舊痕非詩夢斷難
續茶烟低不飛狂吟自清苦慳爾碧紗圍

碑字摩挲慣瓶花問訊纔十年僧半去一笑我重來隔苑仍高
柳侵衣剩古苔慈恩春雨足紅杏爲君開

○ 初冬早起

鵲噪月猶在葉乾天欲晴勞人起中夜山寺已鐘聲林外厨烟

濕溪邊積水明有懷班定遠垂老立功名

鐘定

有懷無可說鐘定一燈深夢斷前村雨春歸昨夜林寒依新火
坐醉擁破書吟屋角多蛛網年來怕理琴

題林比玉采蓴卷卷後有程夢陽詩跋

雪臥青山柳臥湖幽情寫入采蓴圖藥香酒熟秋燈剪只少松
江尺半鱸

生死秦淮未肯歸落花不共片帆飛墊巾樓下淒涼月獨照松
圓老布衣

題已未鴻博崇效寺看梅詩冊

有序

冊內題詩爲已未鴻博平湖陸義山徐勝力任邱龐
雪簪東明袁杜少長洲馮芳賓山陽李公凱六人手

蹟惟望江龍雪樓詩缺佚余讀書廣慈庵于佛殿敗
簾中檢出裝成題小詩三章

當時文酒擅風流官冷僧閑與唱酬卷尾恨遺龍檢討殘絲
遍聚花樓

同年同會城西寺雪北香南宛一家已未詞科盡名士前身修
已到梅花

不見花開又百年荒庭老樹半寒烟鐙昏酒冷蕭蕭雨說著前
遊總惘然

題褚筠心

廷琬

學士西域詩冊後

中禁揮毫三十年人間片紙足流傳而今白髮紅燈畔猶擁殘
書目在眠

城南短巷菜花香黃葉聲中語夕陽未必書生味遘事英雄雖

老戀沙塲

曉出

曉月未出林清光馬前至忽聞讀書聲飄過湖邊寺人生勞如
何城外山猶睡

紅澗溝

行盡西溪路蘆荒別有村數峯花外掩殘月霧中昏風定響禪
板飯香開瓦釜丹砂何日就吾早閉蓬門

程立峰

明韓

大令貽袁子才

救

太史詩集

夢裏悟前因相逢笑語親友才真過我下筆不猶人好事老彌
篤有書官未貧分來梅柳句千里見江村

題小倉山房詩集

萬事看如水一情生作春公卿多後輩湖海此幽人筆陣橫人

古詞鋒怖鬼神粗才莫輕詆斯世有誰倫

庚戌

續題勺湖草堂圖

有序

丁未冬阮吾山侍郎以圖命題余賦五言二章未及

書諸卷也茲令嗣方浦

鍾琦

屬補錄卷後距侍郎沒

又二年矣感慨係之更賦二詩

冒雪尋詩過草廬侍郎風味秀才如清齋景況吾能說三尺梅

花萬卷書

閩笛山陽果斷腸詩情畫意兩蒼茫柴門鶴去無人守秋水一

陂空夕陽

贈筠圃

玉棟

明府

頻年自幟癖難除我亦前生是蠹魚忽見先生開笑口一官蘇

得十車書

萬卷真同萬戶侯百城擁向海東頭自從崑圖藏書後此地歸

然讀易樓

君藏書處

偕友人遊極樂寺有懷前遊諸君子

曲巷迴橋路幾灣清泉危石水潺潺兩三竿竹桃花外六七年
詩貝葉間有酒佐君傷白髮無錢許我買青山前遊賓客飄零
甚江北江南半未還

僧舍偶題

開戶遠塵垢攤書見性情蟬秋自語殘月夜初明雲斷忽峯
出水流剛淵平鐘殘了清夢枕上又詩成

謝達齋

玉德

侍郎贈馬

忽枉名駒贈西風匹練過馳驅天路近朋舊墓垣多古寺秋同

巷斜陽草一坡生平感知已萬里更如何

、 秋日感懷

驟雨忽平砌好風剛下簾山深秋氣覺衣薄客愁添踈磬出林
隙野花齊屋檐醇醪吾不愛清苦一心恬

、 偕潘巽堂

紹興

劉葦塘

大懿

曾賓谷

煥

何蘭士

道生遊

北山請寺

沙軟且間步秋佳時樂羣霞蒸林外雨風皺塔邊雲馴鹿依僧
睡涼蟬報客聞綠陰剛半樹又被遠山分

○

灤平僧寓爲朱春山

瑞格

孝廉題畫

風雨瀟瀟晝掩關塞垣鎮日對青山僧堂又起江湖夢置我溪
雲竹石間

天然一幅輞川圖萬樹桃花尺半鱸九十九峯青不斷老僧指

說永安湖

治亭 鐵保

侍郎自藥陽寄懷姜度香

晟

侍郎詩盛推達

齋侍郎書并及鄙詩次治亭韻兼呈達齋

朝瞰出海扶桑紅神仙樓閣虛無中浮雲淨掃塞垣濶千山削
出秋芙蓉畫窓無事弄禿筆沙磧有客盤琬弓書生不合此驚
鶴奮臂直欲追羆熊櫛林榛徑積苔蘚延緣石磴攀蒼苔山靈
爲我闢險奧逕絕倏與天門通置身已覺樞斗近九州一氣青
濛濛憶昔讀書鍵雙戶瓦燈紙帳春風融良朋三五快抵掌砥
硤時藉他山攻今來塞上寄古寺粥魚齋鼓儕吟筒萬峯高處
一回首下界萬丈垂長虹人生百年貴適意何必苦語如秋蟲
十洲三島本島有昔年童稚今成翁名山經世各有願詩情畫
旨三人同

、
和何蘭士喜雨詩

殘暑消荷渚夕涼生柳門蛟龍挾海至鳥雀向林翻萬葉空山
響孤亭白晝昏賣花翁早至青紫種閒軒

、
牛欄山

仙人跨牛去牛欄空在望平林日氣收遠天雲影釀我乘薄笨
車轉轉峯頭向雷雨須臾作白沙三尺漲樵夫烟翠中拍手山
歌唱何日息塵勞來看桃花放

、
密雲縣

潮河統縣南白河亘縣東曹軍昔駐此辛苦烏桓攻至今戰場
沙血跡斑斑紅夜深撼客夢金鼓猶鐙鏜秋林一葉飄蒼放流
雲中聞說初月亭尚有前朝松

、
黍谷山

北風吹凜冽五穀寒不生
鄒子爾何術天地爲之更想由人事
和萬竅回春聲我來田隴間禾黍多幾莖翠崦不可上廢磴盤
榛荆掬水數游魚側耳聆流鶯槐陰午不涼且傍高雲行

○ 石嶺子

每石必抱雪雲多覺山少山居不擇地往往傍飛鳥瓜田晚涼
近豆棚秋雨小田租有日完詩債無時了乳鹿卧青苔游魚聚
紅蓼勿謝耒耨勞遠勝車馬擾

○ 穆家峪

穆家留古墟前明苦征戰草根雨漬青石樓燒已變夕陽廢瓦
明遠風涼葉扇荒雞叫暮烟老牛臥佛殿耕田爾其勞行役吾
敢倦晚飯竹光中蔬筍亦可薦歸鳥投寒村我行尙郊甸

○ 芹萊嶺

松櫟閉行路天半茅檐挂老翁年七十斫柴村市賣婆娑向馬
頭獻芹述佳話云當冬雪深麋鹿多下砦田家禁私殺捆載奉
官廨又于秋水生打魚沙上晒留以款佳賓那便抵酒債石田
不可耕樓畝但黃犂鳴此瘠土風俗殊不壤

○ 白河澗溝

只此涓滴水萬古石穿破秋雨偶夏之空林鐘磬作一峯有一
色彼此不相流忽飛片月來罌玉帶雲啞此如史遷筆閒中出
頓挫身恐逐鶴飛長抱松根臥

、 新開嶺

不聞遣五丁已許馳萬馬風搖鈴鐸語終日此山下崩雲響積
壁古雪埋殘瓦雷燒老楊樹空腔咄然問寒僧穴作屋烟翠小
闌若楓青雜柿紫不復施丹赭一卷法華經孤燈夜深寫悠悠

行路人誰是知僧者

○ 南天門

萬水滙關下不可不一束又恐束之急峯岫特屈曲赤虬排牖
戶青鳥翔旗纛太行乃肩脰昆侖亦手足潮河西北來日日山
脚浴倍覺芙蓉花顏色絢朝旭騎馬我獨看飛鳥不敢逐恍恍
五嶽外神靈此繫屬以之限中外勝朝太局促

○ 攬勝軒

岩峩攬勝軒可望不可卽但覺高低峯到此都一色茲山開闢
初千榛興萬棘自後兵革興防邊昧遠識不辨岩谷奇翺嫌途
徑仄中外今一家車軌混南北却嗤利病書爲費許筆墨

○ 古北口

巖巖古重鎮今特門戶耳可笑秦皇愚棄此作邊鄙萬骨土中

埋一城天外起山川亦晚達遭逢殊自喜關吏畫桃戈客至仍
倒屣北風吹鼓笳西日照荆杞將軍天上來馬聲秋色裏

兩間房

留此秦時松挂彼太古月青山從東來宛轉氣一歇空際放奇
觀陰森排萬笏霜風催老馬烟色逼蒼鶻紅泉瀉秋澗何處笙
竽發

常山峪

馬餓氣益驕虎老情亦順羨爾把耒人月下古松枕泉聲淡塵
慮山影染鬚髯探幽願久託鑿險力不任身欲萬里行心早衆
綠沁翻悔前遊詩倉促落筆迅

青石梁

寒青天所餘滴入石髓內楚越定無此萬古鎮秋塞前峯插似

箭後寧落如碓滑防馬足折碾恐車輪碎斜陽猶在衣穿林天
忽味長繩輓我腰健夫推我背僂僂檣櫟間綠放新月對霜葉
吐新紅風林散古黛行行臻絕頂畏難笑同輩可知學道人有
進不有退

黃土坎

朝過青石梁暮登黃土坎林綠涇做衣山聲搖醉胆石菌肥可
茹井花紅入覽樹頭鸛鵲鳴轉增客悽慘柴門坐老婦土埽瓦
燈闌殷勤勸止宿前途防虎窺吾自就涼月繫馬蘋婆吸

喀喇河屯

秋色慘無際蜿蜒幾萬里聚而爲村邑熙皞從茲始詎知關外
民耕鑿百年矣高柳撼斜日晚山闌青紫鴉得萬竿竹種此陂
塘裏却笑僕天痴提筐拾榛子

廣仁嶺

百貨載以來一牛喘未息我攀蘿薜上百磴不嫌直孤亭時天
半瞭如鳥展翼林中路尚明墻陰天已黑斜風折松梢屋角生
月色山蟲工苦吟夜涼睡不得

白檀山

夜渡溼餘河朝行白檀州諸峯迎我來寒色壓馬頭阿瞞雖建
功實足爲漢羞徒留漢時月耿耿城東樓山花依舊紅山泉無
停流惟有山中人對月生新愁山中愁何事服田無黃牛語君
愁且捐一飽胡多求

紅螺山

頽樓倚舊山敗瓦埋荒草大都與中都興廢何足道雄師擁十
萬天魔不能保徒留紅杏花春風開自好殷勤語殘衲花落勿

輕掃

○ 九松山

茲山鮮依傍，况復林木繁。九松舉成數，餘皆松弟昆。老鶴時一至，涼蟬不敢喧。車行此憩息，每坐松前軒。纍纍古荆蔓，稜稜殘石根。梯雲更踰澗，百折山中村。松風上衣涼，松綠生醅渾。如對古丈人，揖讓香山門。征馬飢且鳴，歸鴉暝欲翻。

○ 北石槽

新桃兩三捆，衰楊八九樹。村翁帶月歸，活魚溪上捕。石蘭綠上衣，土花紅到屐。謝翁意殷勤，網罟匪所慕。葉輒低颺風，葉叢輕滴露。童子倚牛背，一竿打無數。餐飽更睡足，秋山我能賦。

○ 南石槽

出門星在天，回頭四山失。馬上續詩夢，蕭疎難下筆。月魄濯溪

寒霜色蓄林密年豐百貨賤民和羣盜匿野僧踏白雲酒人醉
紅日萬物苟得所藏身詎無術良田與異書二者買不必

〇〇 青石梁道中

此是何年雨猶飛百道泉柴門淹虎跡石壁洗蝸涎野店秋無
月荒山樹不烟佛堂耿寒夢拈出畫中禪

▲ 常山峪大雨宿程山園 振甲 舍人幕中

露柏與霜桐丹黃各不同馬驕山色裹人老雨聲中宿酒汚繩
榻新涼入角弓幾回搜好句別盡燭花紅

、 贈程立峰 明倅 明府

水乳性本異針芥勢亦懸會合乃有時不知誰使然君涉漢水
淚我歷恒山巔天風吹邂逅頓悟三生前見時殊落落別後中
拳拳寄我兩函書語摯情纏綿金鐵有正色琴瑟無繁絃聞君

擅政要靜以攝其全採華務求實飲水當酌泉聞君擅章句取
精糟粕蠲甘雨鮮怒響皎月無凝烟先生淡泊人縣令而神仙
晚香薦寒菊酌酒秋籬邊萬事自有分請自安吾天

○ 送祝芷塘德麟侍御

中歲乞閒身君原非隱淪晚香憶籬菊疎雨夢湖蘿聞鳥知憐
侶文章不救貧林邊伴袁枚趙翼謳詠太平春

山亦喜君至數峯青巽常野雲閒白晝秋水易斜陽對佛飲休
醉賣文錢自香東華塵土味一自入山忘

舊蹟東南勝殘碑字畫訛山中閒日少貧後好詩多鷗不厭蘆
荻鴒惟貪薜蘿江風吹又起春渚喜無波

、 中秋晚出德勝明宿澄懷園

月比去年好秋從今夜分塔明山寺火橋滄野溪雲酒氣竹間

山磬聲松際聞數峰青不斷涼露白紛紛

○澄懷園與汪雲壑如洋修撰程蘭翹昌期編修夜話

客不與秋期秋來客早知燈光連水溼蟲語吐風遲星斗近依楊竹梧清沁脾無猜羨鷗鷺三兩浴平池

訪金筠莊應琦舍人不值

白鷺沿沙浴文魚傍石遊變詩真是癖得侶復何求烟水迷深巷疎林掩畫樓欲尋雲外寺隔浦喚漁舟

宿永壽庵

踏雪入孤村鴻泥認尚存酒寒漸醒語鐘歇忽鴉翻花缺月移檻竹深風打門有懷前度侶聚散不堪論

送蕭雲巢歸楚

秋水綠無地秋風涼入帆故鄉有蘭芷一路況松杉樹缺煩重

補花繁待細菱有懷著書客幸苦守經函

謂陳每田

○ 送萬秋田

化成

明經歸省

五嶽遊未盡如何返故鄉相思但秋水此去爲高堂露重花
白烟寒楓葉香昨年戟門側揚蘇步槐廊

○ 答王夢樓

文治前輩

天欲厚公福一官升復沉才名傾海外筆法接山陰白髮蕭蕭
在青山處處尋江湖作詩話花氣滌禪心

○ 答趙雲松

翼觀察

東泊海南盛詩才甌北山山林屬耆舊館閣重文章下筆有哀
蔣子才

心餘讀書無漢唐過江諸老在公絕似襄陽

與許香巖

兆桂

談詩秋水閣歸途奉寄兼懷秋巖

健筆健於駿閒情閒似鷗天偏慳一第詩可抵千秋短巷日方

夕空庭花自幽草蟲吟不歇相與爾賡酬
天外亦秋水閣中生暮雲故人情脉脉落葉響紛紛破壁蝸盤
蘇殘書蠹避芸歸時涉烟澤白髮話斜曛

贈吳生季游

方南

短巷復深巷說詩來柳溪秋風踈磬響落日板橋西劍氣酒邊
直雁聲天外低比隣頻送酒爛醉菊花畦

○

寄泰庵

和寧方伯

宛轉碧幢影曾來秋水盧猿啼巴雨外馬踏塞雲初酒半休看
芻花間且讀書少年舊狂態老去可能除

○

寄吉林王生

延蘭

萬樹秋生早經年信到稀書聲砂磧冷花影石城微虎老抱山
睡鼠饑衝雪飛知君耽索句盡日掩柴扉

○ 重陽前一日王芸圃循過訪不值行將就丞倅送之

隔巷踏黃葉到門風雨遭秋方如客冷官不比詩高廬下餐須飽春邊志已牢多情贈瓊珮莫阻海門濤

○ 徐鏡秋檢討招同玉亭

伯麟

簪雪菊溪侍御飲垂蔭軒

同是蕭疎客看茲冷淡花知秋定江雁避月或林鴉天迴三星直燈昏萬竹斜酒闌聽人語多半爲詩譁

、 贈同學

憶昔讀書日世緣君已空人皆憐酒困我獨羨詩工積水天然綠秋花別樣紅相逢蘆荻外白髮老漁翁

、 許香巖過訪不值

踈柳不留客野溪空自涼蛩知守庭戶雁早度衡陽詩入秋逾健花開晚更香登高如有賦珍重貯奚囊

方石歌爲冶亭侍郎賦

有序

余東軒舊置石一方橫三尺縱六寸狀如牀堅潔如玉侍郎乞去以詩勝之

太華峯頭一片石斧鑿猶留五丁跡置我東軒頗愛惜侍郎嗜石如嗜詩謂石奇抵君詩奇石可轉也君其貽吾聞米顛輒興起書畫舫開虹月紫侍郎情性乃如此厥方孚矩堅乎金雲根黯淡苔花深生平未改瑩明心寒菊清泉相掩映淡月涼天精彩迸瘦骨峻峻峭而正交道一日期百年崢嶸萬古芙蓉巔尙無似此石可遷

酬王少林

嵩高

司馬時官河西務

黃葉蕭蕭打瓦屋自汲寒泉寫秋菊菊花如人淡不俗挑燈不厭百回讀先生登第三十年詩成往往江湖傳百里之才何有

焉爲貧而仕時則然日暮空山青未了天風忽送浮嵐渺寒林
不敢儕凡鳥長波萬里輕鷗矯小桃紅斷村烟孤漁人晒網春
陽晡短篷小泊丁字沽看十三本梅花圖

少林家藏本

○ 寶晉齋硯山歌和覃溪先生

媯皇鍊餘兩片石神物乃受神人鞭襄陽米老獲雙璧留貽溯
自南唐年至寶無獨必有偶交輝互映非偶然一庵初葺一山
去五十五峯何有焉香花夜放甘露寺片雲青失虹月船收藏
秘府不可見茲硯幾逐星霜遷其一復歸薛道祖哦詩嘆息顛
復顛江南秋色出層碧想安得精神全古藤書屋共欣賞詩
傳世上石亦傳是一是二未深辨山耶硯耶徒拘牽致令觀者
起疑竇明珠魚目同媿妍覃溪學士慎考覈硯山山硯工言詮
以米名齋志向往對石洒墨情纏綿移來秀石置几席層巖雨

過春娟娟明星一點鸛鵒眼空水欲滴蟾蜍涎夜深剪燭翠明
滅天晴滌墨波洄漩此身直擬到海嶽天風浩浩吹寒烟千言
一洗竹垞誤百年重和漁洋篇世倘好事更搜索九華壺嶺謀
珠聯老人空洞忽笑語吾將下拜吾齋前

○ 阮吾山侍郎秋雨停樽圖

有序

乾隆辛巳秋八月侍郎抱炊白之戚董東亭取潘黃
門語意爲寫是圖今侍郎下世又三年矣

詩人自古憂思多蕭蕭涼雨秋如何人生幾舉金叵羅況際驚
鸞與別鶴相思紅豆三更約黃門語更何人託侍郎好客工詞
章當年斗酒誰爲藏梧桐百尺秋陰涼詩耶畫耶今已矣甘載
風烟存片紙身死應知名不死我與先生情性同哀蟬落葉難
爲工笛聲愴絕山陽風展圖不厭千回看雪深三尺行人斷夜

殘酒冷鐘聲亂

○ 王少林學圃晚香圖

生平不愛看花早，潦倒春風貧亦好。東園花事開，草草晚香之。
意將毋同秋英黯，淡涼雲中梧桐雨。雜芭蕉風，徙倚空庭烟一
縷。霜壓楓林更，菰圃黃葉村中真樂土。君廬閒說多梅花，十三
本樹孤山家。逢人何必冬心誇，獨我就幽百事置。月明時傍東
籬睡，冰雪侵人曾不避。開纖一笑題新詩，此意問花花未知。迢
迢烟水空相思。

○ 冬曉招程立峰州公集詩龕

山色入城青，忽紫雪凍溪頭。雲不起，寺樓粥鼓猶未止。先生款
步荒齋矣，君舉賢書余未生。同年錯被江湖稱，隨園詩話謂
余爲君同年登科登第皆虛榮。寒山珍重冰霜盟，酒懷那及詩懷好。與君恨不

相逢早詩源我欲從君討明湖二月湖生波尺書欲寄春鱗多
桃花紅奈先生何

○ 贈詹玉淵 炯

磨墨磨人卅載心硯田愛惜好光陰日高猶抱梅花睡不問門
前雪淺深

○ 王少林示咏雪詩

山色凍如睡村烟低欲靡蒲階折竹聲碎入梅花裏夢往羅浮
間赤足涉江水手提兩蝴蝶自言是鳳子醒猶臥石龕飯熟人
未起

○ 雪後治亭侍郎招同菊溪侍御芝岩 文寧 編修暨閬峯

玉保 閣學集石經堂和治亭韻卽效其體

東華人歎西華閭十里五里朝陽暹積雪深埋萬竹尾凍雲亂

撲雙槐檐侍郎古雕更今潤讀書毋乃忘傷廉不薄新雨愛舊
南北風寒勒春風簾眉山主人蓬山客大蘇小蘇齊掀髯交光
鬱勃星斗動詩情浩蕩江湖兼綠酒澆胸性情見紅燈照鬢年
華淹孤桐詎必學幽蕙東鰈何苦謀西鵲一物各懷一物智太
華不棄游塵纖鼓鐘既備待絲竹醢醢欲薦資梅鹽主人大笑
客無語門韻隨手珠璣拈書室晴烟散朽蠹城樓寒色淒冰蟾
歸來茅舍且高臥冬花破蕾秋菰醅

深冬過王鑑溪賜硯齋

香醪獨酌興何如老去詩名總未除柳得春遲原耐冷梅開花
少莫嫌踈嬌兒放學求分果少婦偷閒代檢書門外雪深君不
問蕭蕭白髮臥蓬廬

和吳淵穎題錢舜舉張麗華侍女汲井圖

芙蓉檻外梧桐樹故宮容易秋風度美人何事淚雲凝綰繫銀
牀朝復暮綺閣曾溫豈蔻湯香溪誰盟薔薇露壁月瓊枝艷一
時丹砂難得紅顏駐船頭欲甲鼓聲哀簾角金瓶花影妬曉夢
猶傳醉裏歌鬟雲一縷夢蘭炷至今枯髡別寒泉宮鴉啼罷華
林誤南域空聞夜雨聲轆轤不轉蟾蜍吐

○ 答袁子才前輩

名著入山前入山三十年看人多白眼開世少朱絃食色從吾
好文章讓爾傳書生重名教慎勿學神仙